

to helpene, also se beste konden; unde wered dat me dit in vorschre-  
 vener wise nicht wol uthrichten konde, so sint wij eyn gheworden, dat  
 wij des by enander bliven schullen unde willen, dat me dat myd macht  
 edder anders, wu wij dat uthrichten konden, irmaneden; unde were  
 5 uns denne dar to behoff eynes heren edder meir dar to to theende unde  
 to hebbende, so schullen unde willen wij dar na stan unde bearbey-  
 den, dat we den edder de kregen mit deghedingen edder gheschenke,  
 wu wij mochten, unde wad dat kostede, de koste schullen unde willen  
 wij liden unde unser eyn iowelk na antale unde redelicheyd dar to  
 10 lecghen, also hir na benompt unde beschreven is: wij van Gosler  
 veiffich Rinische guldenen, we van Magdeborch tweyhundert Rinische  
 guldenen, wij van Brunswik tweyhundert Rinische guldenen, wij van  
 Halle tweyhundert Rinische guldenen, wij van Hildensem seventich  
 Rinische guldenen, wij van Halberstad veifftech Rinische guldenen,  
 15 wij van Gottinge seventech Rinische guldenen, wij van Queddelinge-  
 borch seventich Rinische guldenen, we van Aschersleve seventich  
 Rinische guldenen, wij van Osterrode drittech Rinische ghuldenen, we  
 van Eymbeke seventech Rinische guldene, we van Honover veiffich  
 Rinische guldenen, we van Helmestidde drittech Rinische guldenen,  
 20 we van Northeym seventich Rinische guldenen; unde welkerem unsen  
 van dussen steden dat best belegen were, de scholden dar to helpen  
 mit macht unde wapenden luden, unde welkeren unsen dat nicht bele-  
 gen were, de scholden dar to helpen mit ghelde na redelicheyd und  
 na antale, also vor gheroret is. Were ok dat iemend uns edder de  
 25 unse vorwoldigede boven recht edder veydede, so scholden unde wol-  
 den wij anderen stede, de dar to beleggen weren, vor de stad, de me  
 also vorwoldighede edder veydede, ere unde recht beden und one ore  
 deghedinge helpen besenden, dar one dat belegen were; unde wolden  
 sek de jenne, de se also vorwoldighede, sek an rechte nicht ghenogen  
 30 laten, so enscholden wij noch enwolden de woldeners nicht vorderen  
 mit spise vodere noch myd ghedrencke, myd harnesche edder schote  
 nicht sterken unde neyne vordernisse one don, dar wij des van ere  
 weghene umme ghan mochten unde dar we dat wusten. Were ok dat  
 lichtverdighe gesellen de umbeslotet weren edder anders we uns edder  
 35 de unse edder den copman ackerman mortbrande rovede edder besche-  
 dededen dar bovene, wanne me one ere unde rechtes plegen wolde,  
 welcher stad dat scheghe, were de des van uns begherende den edder  
 de uptoholdende, deme scholden unde wolden wij also don unde de  
 upholden uppe recht unde der stad, der des noyd were, truweliken dar  
 40 ane by bestan unde to der vorderinghe ores rechten behulpen sin, so  
 wij best konden unde mochten, wanne uns edder unser welkem dat  
 van der beschadeden stad witlik unde de namhafftech maket worden  
 unde dat van uns sammet offte besundern gheesschet worde. Vortmer  
 also ichteswelke vorkerde lude dar na bestan, dat se twydracht uplop  
 45 vorstoringhe der rede in den steden meynen to donde, welk unser dat  
 vorneme helmeliken<sup>1</sup> edder openbare, de scholde unde wolde der stad,

1) So.